

四庫全書

史部

欽定四庫全書

史部

大事記解題卷六

七

詳校官編修_臣溫汝适

刑部郎中_臣許兆椿覆勘

總校官進士_臣朱鈐

校對官庶吉士_臣王朝梧

謄錄監生_臣王翰

欽定四庫全書

大事記解題卷六

宋 呂祖謙 撰

秦昭王五十二年

解題曰是歲秦既滅周故以秦年統諸國曹叅六代
論曰三代之君與天下共其民故天下同其憂秦王
獨制其民故傾危而莫救先王知獨治之不能久也
故與人共治之知獨守之不能固也故與人共守之
兼親疎而兩用參同異而竝進是以輕重足以相鎮

親疎足以相衛并兼路塞逆節不生及其衰也苞茅

不貢齊師伐楚宋不城周晉戮其宰荆楚負固方城

雖心希九鼎而畏迫宗姬姦情散於胷懷逆謀消於

唇吻

以粉反

斯豈非信重親戚任用賢能枝葉碩茂本

根賴之與暨乎戰國諸姬微矣至於王赧降爲庶人

海內無主三十餘年

前漢諸侯王表曰數極德盡既於王赧降爲庶人用天年終號

位已絕於天下尚猶枝葉相持莫得居其虛位海內無主三十餘年顏師古曰秦昭襄王五十二年周初

以五十六年昭襄王卒孝文王立一年而卒莊襄王立四年而卒子政立二十六年而乃併天下自號始

皇帝是爲三十五年無主也

秦據形勝之地征伐關東蠶食九國

至於始皇乃定天位曠日若彼用力若此豈非深根

固蒂不拔之道乎呂不韋春秋成於始皇八年

按呂氏春

秋維秦八年歲在涒灘秋甲子朔朔之日良人請聞十二紀此其書成之歲月也涒灘者申也通鑑皇極經世始皇八年歲在壬戌後呂氏春秋一年不韋當時人必不誤蓋後世筭歷者之差也其聽言

篇曰今周室旣滅而天子已絕莫大於無天子無天

子則彊者勝弱衆者暴寡以兵相殘不得休息今之

世當之矣然則始皇二十六年以前秦固未嘗敢稱

天子蓋海內無主之時也

王稽誅

解題曰范雎既相言於昭王曰非王稽之忠莫能內

臣於函谷關昭王召王稽拜河東守三歲不上計

漢郡

守上計蓋秦制也凡郡常以春行所至縣勸民農桑振救乏絕秋冬遣無害吏按訊問諸囚平其罪法論課殿最歲盡遣吏上計又任鄭安平昭王以為將軍安平降趙

應侯席彙請罪秦之法任人而所任不善者各以其罪罪之於是應侯罪當收三族秦昭王恐傷應侯之

意乃下令國中有敢言鄭安平事者以其罪罪之而

加賜相國應侯食物日益厚以順適其意後二歲王

稽為河東守與諸侯通坐法誅

徐廣曰昭王五十一年按戰國策秦攻邯

鄲十七月不下莊謂王稽曰君何不賜軍吏乎王稽

曰吾與王也不用人言莊曰君懷主輕下之日久矣

一人成虎十夫搃椎衆口所移毋翼而飛不如賜軍

吏而禮之王稽不聽軍吏窮果惡王稽而反然則王

稽之禍固非一日之積方秦圍邯鄲之時昭王固已

入軍吏之譖而疑之矣稽假人之寵而虐其天下

之淺人也其

殺身宜哉

而應侯日益以不懌昭王臨朝歎息應

侯進曰臣聞主憂臣辱主辱臣死今大王中朝而憂

臣敢請其罪昭王曰吾聞楚之鐵劍利而倡優拙夫
鐵劍利則士勇倡優拙則思慮遠夫以遠思慮而御
勇士吾恐楚之圖秦也夫物不素具不可以應卒今
武安君既死而鄭安平等畔內無良將而外多敵國
吾是以憂欲以激勵應侯應侯懼不知所出蔡澤聞
之往入秦

范雎免蔡澤爲丞相

解題曰太史公序傳列秦將相曰鞅去衛適秦能明

其術彊霸孝公後世遵其法天下患衡秦毋饜而蘇
子能存諸侯約從以抑貪強六國旣從親而張儀能
明其說復散解諸侯秦所以東攘雄諸侯樗里甘茂
之策苞河山圍大梁使諸侯歛手而事秦者魏冉之
功南拔鄢郢北摧長平遂圍邯鄲武安爲率破荆滅
趙王翦之計至於范雎蔡澤獨曰能忍詢於魏齊而
信威於強秦推賢讓位二子有之其辭與前數子異
矣

西周民東亡

解題曰赧王既獻西周之邑其民不樂屬秦亡歸東
周去年秦歸赧王於周使寄食舊國所謂西周君者
亦使之同秦吏守故地焉今赧王既卒西周民又東
亡故降西周君爲庶人而遷惡狐也自赧王降周統
已絕東周雖未亡特邾莒附庸之類耳所以存之而
未論也按蔡澤傳蔡澤爲秦相東收周室然則遷西
周君其蔡澤爲相之日歟惡狐史記正義曰括地志

云汝州外古梁城卽愚狐聚

徐州

解題曰史記索隱曰按說文邾邾之下邑在魯東又郡國志魯國薛縣六國時曰徐州徐與邾竝音舒史記正義曰當時屬魯故楚伐取也

秦昭王五十三年楚齊韓燕趙皆來賓

解題曰按秦紀天下來賓魏後秦使摎伐魏取吳城史記正義曰吳城在陝州河北縣東北虞山之上亦名吳山周武王封弟虞仲於周之北吳城卽北城也

韓王入朝魏委國聽令蓋周亡而諸侯皆服於秦也
趙邯鄲廕焚

解題曰邯鄲國都也廕說文曰芻藁之藏也

秦昭王五十四年楚徙都鉅陽

解題曰事見年表按楚頃襄王徙都陳而始皇六年
春申君用朱英策去陳徙壽春不云自鉅陽徙壽春
也年表所載未可知今姑存之

雍

解題曰今鳳翔府天興縣

秦昭王五十五年平原君卒

解題曰按孔叢子子高以爲趙平原君霸世之士惜
不遇其時也其子子順以爲哀世之好事公子無霸
相之才也今以事考之則斌之品題實當穿特隨俗
而不察耳賴濱蘇氏曰趙勝傾身下士以竊一時之
聲可耳至於為國計慮勝不知也趙欲距燕有廉頗
趙奢不能用而割地與齊以借田單知單之賢而不

知其不爲趙用也及韓馮亭以上黨嫁禍於趙趙豹明其不可而勝貪取之長平之禍成於勝一言此皆貴公子不知務之禍也乃欲使之相危國拒強秦難矣哉

衛懷君朝魏魏殺之立其弟

解題曰懷君者嗣君之子也世家載魏囚殺懷君魏更立嗣君弟是爲元君元君爲魏壻故魏立之徐廣曰班氏云元君者懷君之弟則亦嗣君之子也兩說

不同通鑑從徐氏按嗣君在位四十二年懷君在位二十一年使嗣君有弟尚存蓋亦八十餘矣徐氏之說是也

秦昭王五十六年追尊唐八子爲唐太后與昭王合葬
解題曰唐八子孝文王之母也辛八子以昭王之母
遂僭尊稱旣失禮矣唐八子又加以合葬則又甚焉
禮庶子爲君爲其母無服不敢貳尊者也自魯成風
以來是禮廢矣於秦乎何誅

燕栗腹伐趙

解題曰延平陳氏曰燕使栗腹約懼於趙反而言趙之可伐其為使也可謂不周矣將渠見信於敵而其君不早信用急而後相之猶足以却趙師賢者之於國何如哉

趙以廉頗為假相國

解題曰假相國之名始於此後二年趙又有假相樂乘楚漢之際是名蓋紛紛矣所謂假者未必與聞國

政特借國相之名以重其權而已

秦孝文王元年十月己亥王除喪卽位赦罪人辛丑王薨

解題曰按本紀孝文王元年赦罪人修先王功臣褒厚親戚弛園囿孝文王除喪十月己亥卽位三月辛丑卒

聊城

解題曰史記正義云括地志云故聊城在博州聊城

縣

魯仲連以書下之

解題曰賴濱蘇氏曰戰國游談之士非從卽衡說行
交合而寵祿附之故士不厭詭詐爭走於利魯仲連
辯過秦儀氣陵髡衍而從橫之利不入於口因事放
言切中機會排難解紛如決潰堤不終日而成功逃
避爵賞脫屣而去戰國一人而已矣

秦莊襄王元年大赦

解題曰按本紀莊襄王元年大赦罪人修先王功臣
施德厚骨肉而布惠於民孝文王莊襄王元年皆有
赦秦漢以後初即位肆赦蓋始於此至於修功臣厚
親戚布德惠則自古人君初政之所常行雖秦之暴
不能廢也

遷東周君於陽人

解題曰按本紀東周君與諸侯謀秦秦使相國呂不
韋誅之盡入其國秦不絕其祀以陽人地賜周君奉

其祭祀

史記正義云括地志云陽人在汝州梁縣西

前漢地理志周地柳

七星張之分野也今之河南雒陽穀城平陰偃師鞏

緱氏是其分也初雒邑與宗周通封畿東西長而南

北短短長相覆為千里至襄王以河內賜晉文公又

為諸侯所侵故其分地小徐廣曰周比亡之時凡七

縣其縣名即星分野所載河南雒陽以下是也星經

出於戰國之末故舉當時東西周疆界以言之地理

志又謂周人之失巧偽趨利貴財賤義高富下貧喜

爲商賈此亦其末流之敝耳

封呂不韋河南洛陽

解題曰割東西周之地以封之也

拔成臯滎陽初置三川郡

解題曰按本紀年表世家使蒙驁伐韓拔成臯滎陽秦界至大梁初置三川郡所謂三川者河洛伊也三川爲郡則據天下之樞混一之勢成矣自惠王以來禱祠而求者也成为臯滎陽本東虢國穆天子傳云七

萃之士生捕獸卽獻天子天子畜之東虢則東虢

畿內諸侯也

前漢地理志云成臯故虎牢亦名制左傳云制岩邑也虢叔死焉地理志注又

云滎陽故虢國則成臯滎陽皆東虢地也成臯今河陽汜水縣滎陽今鄭州滎陽縣周宣以後

披以封鄭至戰國地入於韓秦旣滅東西周又取韓

成臯滎陽合而爲三川郡此郡之境卽東都王畿之

舊也在今爲衛懷孟開封鄭河南汝陝虢拱之地滎

陽成臯自春秋以來常爲天下重地繇秦而上晉楚

於此而爭霸謂爭鄭也繇秦而下楚漢於此而分雌雄天

下既定七國淮南衡山之變猶睥睨此地而決成敗
焉東都以後言形勢其及之者鮮矣人事既改則地
之輕重亦有時而移也

楚滅魯

解題曰魯姬姓武王封周公於少皞之虛曲阜周公

不就封留佐武王子伯禽受封之魯是為魯公

索隱曰周

公之元子就封於魯次子留相王室代為周
公其餘食小國者六人蔣凡邢茅胙祭也

起魯公

至頃公凡三十三世前漢地理志魯地奎婁之分野

也東至東海南有泗水至淮陰臨淮之下相睢陵僮
取慮皆魯分也孔子曰齊一變至於魯魯一變至於
道言近正也瀕洙泗之水其民涉渡幼者扶老而代
其任俗既益薄長老不自安與幼少相讓故曰魯道
廢洙泗之間斷斷如也去聖久遠周公遺化銷微孔
氏庠序衰壞地陋民衆頗有桑麻之業亡林澤之饒
俗儉嗇愛財趨商賈好訾毀多巧偽喪祭之禮文備
實寡然其好學猶愈於他俗

史記正義云徐廣云卞
一作下括地志云下邑

故城今宋州崑山縣是又云
在兗州泗水縣東北臨泗水

秦莊襄王二年榆次新城狼孟

解題曰史記正義曰括地志云榆次并州縣卽古榆
次地也新城者朔州善陽縣西南狼孟在并州陽曲
縣東北

魏趙攻燕

解題曰按趙世家延陵鈞率師從相國信平君助魏
攻燕

楚徙封黃歇於吳

解題曰子重請取於申呂以爲賞田申公巫臣曰不可此申呂所以邑也是以爲賦以御北方若取之是無申呂也黃歇告於楚王淮北地邊齊其事急請以爲郡便其說與申公巫臣同意則利吳之安且富耳

秦莊襄王三年

解題曰秦紀莊襄王有四年賴濱蘇氏曰秦紀多以先王之末年爲後王之元年當以年表爲定今從之

魏公子無忌率五國兵敗秦軍於河外

解題曰按本傳走蒙驁遂乘勝逐秦軍至函谷關抑秦兵秦兵不敢出當是時公子威振天下自戰國以來秦爲諸侯所敗者獨孟嘗信陵兩戰耳一則名之正也一則將之賢也名以利敗賢以疑廢六國之亡

安得責命於天哉

史記正義曰括地志云高都故城今澤州是汲在衛州所理汲縣西

南徐廣云汲一作汲汲縣亦在河內

龍光汾門臨樂葛平舒

解題曰史記正義云龍光在北新城

光音奪

汾門在易

州北平縣臨樂在幽州固安縣葛在瀛州高陽縣平

舒在蔚州靈丘縣

五月丙午王薨子政立是爲秦始皇帝國事皆委於呂不韋號稱仲父

解題曰按本紀當是之時秦地已并巴蜀漢中越宛有郢置南郡矣北收上郡以東有河東太原上黨郡東至滎陽滅二周置三川郡呂不韋爲相招致賓客

游士欲以并天下李斯爲舍人蒙鰲王齧庶公等

晉陽反

解題曰反而歸趙也

秦始皇帝政元年作鄭國渠

解題曰前漢溝洫志韓聞秦之好興事欲罷之無令

東伐乃使水工鄭國間說秦令鑿涇水自中山顏師古曰

中讀爲仲卽九史記正義曰焦竝北山東

變之東仲山也

西邸瓠口

獲藪亦名瓠

注洛

史記正義曰洛則同州西漆沮水也

三百餘里欲以溉田中作而

覺秦欲殺鄭國鄭國曰始臣爲間然渠成亦秦之利也秦以爲然卒使就渠於是關中爲沃野無凶年秦以富强卒并諸侯因名曰鄭國梁始皇雖少而其謀國者乃如此

魏公子無忌以毀廢

解題曰魏安釐王始畏公子之賢能不敢任以國政魏趙唇齒國也秦圍邯鄲公子數請賓客辯士說王

萬端豈獨爲其姊計哉及奪晉鄙軍以存趙則遂爲
深讐矣雖迫於危亡不得已而復用公子然猜且闇
猶夫人也雖微秦間亦不可與共功矣

秦始皇帝二年趙以李伯爲代郡守

解題曰按戰國策齊人李伯見孝成王王說之以爲
代郡守而居無幾何人告之反孝成王方饋不墮食
不驚故食無幾何告者復至孝成王不應已乃使使
不墮也

者言齊舉兵擊燕恐其以擊燕爲名而以兵襲趙故

發兵自備今燕齊已合臣請要其敝而地可多割自是之後爲孝成王從事於外者無自疑於中者孝成王雖納上黨將趙括未得爲明主然猶能用頗牧以持其國觀李伯之事則其能駕馭豪傑蓋有以也今附於孝成王薨之歲

趙李牧大破匈奴十餘萬騎單于奔走

解題曰按本傳李牧大破匈奴單于奔走其後十餘歲匈奴不敢近趙邊城悼襄王元年廉頗旣亡入魏

趙使牧攻燕拔武遂方城然則李牧之勝匈奴蓋在
孝成王之世今附見於孝成王薨之歲單于者君長
之號前漢匈奴傳云單于廣大之貌也言其象天單
于然也

繁陽

解題曰按前漢志屬魏郡應劭曰在繁水之陽

秦始皇帝三年大饑

解題曰秦紀所書蓋秦之地饑也

暘有詭

解題曰暘音場蓋地名

秦始皇帝四年趙李牧拔武遂方城

解題曰年表世家皆書於今年李牧傳載於悼襄王
元年今從年表世家

七月蝗疫令百姓內粟拜爵

解題曰入粟拜爵始於此

魏公子無忌卒

解題曰按本傳公子謝病不朝日夜爲樂飲者四歲
竟病酒而卒其歲魏安釐王亦薨秦聞公子死使蒙
驁攻魏拔二十城初置東郡其後秦稍蠶食魏十八
歲而虜魏王屠大梁高祖始微少時數聞公子賢及
卽天子位每過大梁常祠公子高祖十二年從擊黥
布還爲公子置守冢五家世世歲以四時奉祠公子
秦始皇帝五年酸棗燕虛長平雍丘山陽東郡

解題曰裴駟曰陳留有酸棗縣汝南有長平縣陳留

有雍丘縣河內有山陽縣東郡今為博濮大名滑開

德之地

史記正義云燕虛在濮州雷澤縣東

趙龐煖取燕軍殺劇辛

解題曰燕昭王之招賢者也劇辛自趙往蓋燕之舊臣也辛與龐煖舊交易之而反為所殺不知辛之不察與或者煖之才畧有進不可以故意待之也然則人豈易知哉

會盟于魯柯

解題曰戰國末猶有會盟故特著之

秦始皇帝六年楚魏韓趙燕衛合從來伐爲我所敗

解題曰秦本紀書韓魏趙衛楚共擊秦取壽陵

史記正義

云徐廣云
在常山

秦出兵五國兵罷而趙世家云龐煖將趙

楚魏燕之銳師攻秦蕞不拔移攻齊取饒安則燕亦
同伐秦非止五國也齊自君王后以來事秦不與諸
侯同伐是以諸侯歸師移兵攻之且以償兵費也徐
廣曰蕞在新豐饒安在渤海或云饒屬北海安屬平

原

春申君傳稱至函谷關秦出兵攻諸侯兵皆敗走然則蕞在函谷關左右方攻之而值秦兵之出也

朝歌

解題曰史記正義曰括地志云在衛州縣西本妹邑

殷都也

徙衛於野王

解題曰衛世家載於後二年非也今從年表魏楚世

家

史記正義曰野王懷州城也

楚徙都壽春命曰郢

解題曰楚都所至命曰郢猶晉都所至命曰絳也壽

春今壽州壽春縣

楚考烈王納黃歇妾生子悍

解題曰春申君傳載此於徙都之後今從之

李園女弟說春

申君曰君相楚二十餘年而幽王又有弟郝則春申君納女必在考烈王未薨數年前正當此時也

秦始皇帝七年彗星見

解題曰按本紀彗星先出東方見北方五月見西方

夏太后薨

解題曰莊襄王母也

秦始皇帝八年王弟長安君成蟜將兵擊趙而反

解題曰顏師古曰本使長安君擊趙至屯留而謀反
作亂故賜長安君死斬其軍吏遷其黔首也屯留上
黨縣也臨洮卽今之洮州也按本紀下文將軍壁死
卒屯留蒲鶮反戮其屍司馬貞徐廣謂成蟜為將軍
而反秦軍擊之而成蟜壁於屯留而死士卒爲成蟜
戰死者皆戮其屍然則成蟜據邑而反戰不勝而死

耳

河魚大上

解題曰按本紀河魚大上輕車重馬東就食

索隱曰往河旁

食魚也

前漢五行志曰劉向以爲近魚孽也逆流而上

也

封嫪毐爲長信侯

解題曰按本紀嫪毐封爲長信侯予之山陽地令毐居之宮室車馬衣服苑囿馳獵恣毐事無小大皆決

於毒又以河西太原郡更爲毒國

嫪音潦毒音倚亥反

戰國策

曰秦攻魏急或謂魏王曰秦自四境之內執法以下
至於長輓者曰與嫪氏乎與呂氏乎雖至於閭門之
下廊廟之上猶之如是也今王割地以賂秦以爲嫪
毒功卑體以尊秦以因嫪毒王以國贊嫪毒以嫪毒
勝矣王以國贊嫪氏太后之德王也深於骨髓王之
交最爲天下上矣今繇嫪毒氏善秦而交爲天下上
天下孰不棄呂氏而從嫪氏天下必棄呂氏而從嫪

氏則王之怨報矣。嫪呂爭權畧見於此。孔叢子載此說以爲子順之策。子順相魏進退有聖賢之風。寧忍出此乎。

韓以韓玘爲相

解題曰：李斯上二世書曰：趙高兼行田常子罕之逆道而劫陛下之威信，其志若韓玘爲韓安相也。然則韓之滅蓋繇相玘。今載於韓王安卽位之年。

秦始皇帝九年垣蒲陽衍

解題曰史記正義曰括地志云垣在絳州垣縣西北蒲邑在隰州隰川縣南蒲水之北衍在鄭州

王冠帶劍

解題曰始皇年二十一帶劍秦俗也

嫪毐作亂夷三族

解題曰按呂不韋傳秦紀有告嫪毐實非宦者毐聞之秦王驗左右未發秦王之雍郊毐恐禍起乃與其黨謀矯王御璽及太后璽以發縣卒及衛卒官騎戎

翟君公舍人將

秦之兵制略見於此縣卒一也衛卒二也官騎三也戎翟四也舍人五也

秦國太后用事故

太后璽亦可發兵欲攻斬年宮爲亂

地理志斬年宮在雍

王知

之令相國昌平君昌文君發卒攻毒戰咸陽斬首數

百皆拜爵及宦者皆在戰中亦爵一級

亦者秦之宦者本無拜爵

之法毒等敗走卽令國中有生得毒賜錢百萬殺之五

十萬追斬毒於好時其黨衛尉竭內史肆佐弋竭中

大夫令齊等

衛尉內史之名始見於此魏有中大夫須賈則非獨秦有之也漢書百官表曰

秦時少府有佐弋漢武帝改爲佽飛掌弋射者

二十人皆梟首車裂以徇滅

其宗及其舍人輕者爲鬼薪

應劭曰取薪給宗廟爲鬼薪也如淳曰律說鬼

薪作三歲

及奪爵遷蜀

又輕者乃奪爵徙蜀

四千餘家房陵餘見

通鑑

秦始皇帝十年逐客

解題曰李斯傳云韓人鄭國來間秦作渠而覺秦宗室大臣請一切逐客方是時呂不韋專國不韋亦客也孰有敢言逐客者乎本紀載於呂不韋免相之後得之矣

齊王趙王來置酒

解題曰凡諸侯相朝主國設饗燕以禮之未有賓客
反置酒者蓋齊趙畏秦極其諂而然也齊世家書王
入朝秦秦王政置酒咸陽然則秦亦置酒以報之歟
用茅焦諫迎太后于雍

解題曰按本紀齊人茅焦說秦王曰秦方以天下為
事而大王有遷母太后之名恐諸侯聞之繇此倍秦
也秦王乃迎太后於雍而入咸陽復居甘泉宮

徐廣曰咸

陽南宮也

說苑所載其辭多浮夸且未見所以動始皇者

本紀所書簡而實矣戰國策載頓弱面詆始皇不孝
始皇勃然而怒頓弱告以山東戰國有六威不掩於
山東而掩於母始皇乃霽怒問戰國可兼之計然則
始皇所重者獨兼并諸侯耳茅焦所以能復太后之
特以諸侯倍秦恐之非能以母子天性感悟之也
以尉繚為國尉

解題曰按本紀大梁人尉繚來說秦王曰以秦之強

諸侯譬如郡縣之君臣但恐諸侯合從翕而出不意此乃智伯夫差濬王之所以亡也願大王毋愛財物賂其豪臣以亂其謀不過亡三十萬金則諸侯可盡秦王從其計見尉繚亢禮衣服食飲與繚同繚曰秦王爲人蜂準長目摯鳥膺豺聲少恩而虎狼心居約易出人下得志亦輕食人我布衣然見我常身自下我誠使秦王得志於天下天下皆爲虜矣不可與久游乃亡去秦王覺固止以爲秦國尉卒用其計策而

李斯用事尉繚之策大略與李斯同不過以金啗之

耳前此范雎之散合從

戰國策云天下之士合從相聚於趙而欲攻秦秦相應侯

曰王勿憂也請令廢之秦於天下之士非有怨也相聚而攻秦者以已有富貴耳王見大王之狗卧者卧起者起行者行止者止毋相與鬪者投之一骨輕起相牙者何則有爭意也於是使唐雎載音樂予之五千金居武安高會相與飲謂邯鄲人誰來取者於是其謀者固未可得予也其可得予者與之昆弟矣公與秦計功者不問金之所之金盡者功多矣今令人復載五千金隨公唐雎行之武安散不能三千金天下之士大後此陳平之間項羽
陳平說高帝曰大王相與鬪矣
反問項王信謔必內相誅漢王以爲然乃
出黃金四萬斤予平恣所爲不問出入

同出一術

蓋亂世風俗貪鄙故此術每用每中有言禮義廉耻
於多事之際必競以為迂濶不知撥亂之策莫要於
此爲人上者盍亦少思哉

秦始皇帝十一年燕貍陽

解題曰史記正義云按燕無貍陽疑字誤當作漁陽
趙廢太子嘉

解題曰按趙世家太史公曰吾聞馮王孫曰趙王遷
其母倡也嬖於悼襄王廢適子嘉而立遷遷素無行

信讒故誅其良將李牧用郭開豈不謬哉秦既虜遷
趙之亡大夫共立嘉為王王代六歲秦進兵破嘉遂
滅趙以爲郡嘉既正且賢猶能崛起於敗亡之後但
勢去而不能支耳使得蚤承統緒豈不能保邦於未
危乎此太史公所深恨也遷族類不正竟無行而亡
其國然則帝王之家政其可不以族類為先乎嘉遷
廢立不知何年今附見於悼襄王薨之前

徙呂不韋於蜀

解題曰致堂胡氏曰秦王賜不韋書曰君何親於秦號稱仲父諱之也不知其欲蓋而益彰矣古之有國有家者雖買妾必擇其良惡族類之龐也而羸楚悅色納姬不疑其故遂使大賈生敗心自是有天下者蓋呂姓也而栢翳宗廟至此已絕為史者當自始皇元年書為後秦正其姓氏庶幾實錄矣

秦始皇帝十二年呂不韋自殺

解題曰按本紀文信侯不韋死竊葬其舍人臨者晉

人也逐出之秦人六百石以上奪爵遷五百石以下
臨遷勿奪爵秦待其國人與他國人不同於此略可
見六百石以上則秩之稍高者也

漢酈曼容為官不肯過六百石輒自

免
去餘見通鑑

不雨

解題曰按本紀天下大旱六月至八月乃雨

復嫪毐舍人遷蜀者

解題曰按呂不韋傳秦王所加怒呂不韋嫪毐皆已

死乃皆復歸嫪毐舍人遷蜀者秦法雖峻然始皇未
并天下以前猶間有寬宥至於用水德之後則無復
有此等政事矣

秦始皇帝十三年平陽

解題曰平陽世家作武城李牧傳作武遂

史記正義
云括地志

云平陽在相
州臨漳縣西

秦始皇帝十四年桓齮取趙平陽武城宜安

解題曰以年表世家考之去年桓齮攻平陽殺扈輒

今年桓齮定平陽武城宜安李牧與戰却之趙封牧
爲武安君通鑑用李牧傳并載於去年不知牧傳特
終言之也史記正義曰武城卽貝州武城縣宜安在
恒州藁城縣西南肥在恒州藁城縣西春秋時肥子
國

韓非

解題曰按新序申子之書號曰術商鞅之書號曰法
太史公謂非喜刑名法術之學則兼治之也六經孔

孟之教與人之公心合故治世宗之申商韓非之說
與人之私情合故末世宗之彼各有所合也

韓王納地效璽請為藩臣

解題曰按本紀年表皆書韓王請為臣於殺韓非之
後則非韓非所將之命也

秦始皇帝十五年大興師伐趙拔狼孟番吾趙李牧擊
破我軍遂還

解題曰番吾已為秦所得至是復書取者邊地往來

固無常也秦大興師志在滅趙而為李牧所却國其
可以無人乎

史記正義云徐廣云番音盤常山有蒲吾縣括地志云在常山房山縣東番蒲

古今音

異耳

秦始皇帝十六年初令男子書年

解題曰按周官媒氏男女自成名以上皆書年月日
名焉成名子生三月父名之也內則子生三月之末
男角女羈以見於父父名之宰書曰某年某月某日
生而藏之宰告閭史閭史書為二其一藏諸閭府其

一獻諸州史州史獻諸州伯州伯命藏諸州府其制
詳密如此戰國以來不復重民之生此制廢缺久矣
始皇復令男子書年其制及男而不及女特恐民之
辟征役耳豈有三代重民之意哉然下一切之令而
使書之亦豈能得其實乎

徐幹中論曰民數為國之本也先王周知其萬民衆

寡之數乃分九職焉九職既分則勛勞者可見勤惰者有聞也然而事役不均者未之有也事役既均故上盡其心而人竭其力國家殷富大小不匱百姓休和下無怨疾焉周禮孟冬司寇獻民數于王王拜而受之登于天府內史司會冢宰貳之其重之也如是今之為政者未之知恤也譬猶無田而欲樹藝雖有

農夫安能措其強力乎是以先王制六鄉六遂之法所以維持其民而為之綱目也使其鄰比相保受賞罰相延及故出入存亡臧否逆順可得而知也及亂君之為政也戶口流於國版夫家脫於聯伍避役逋逃者有之於是姦心競生而偽端竝作小則濫竊大則攻劫嚴刑峻令不能救也人數者庶事之所自出也莫不取正焉以分田里以令貢賦以造器用以制祿食以起田役以作軍旅國以建典家以立度五禮用修九刑用措其惟審人數乎

秦始皇帝十七年內史騰滅韓

解題曰韓姬姓自景侯虔受封至王安凡十一世按本紀李斯之復留也說秦王請先取韓以恐他國於

是使斯下韓然則秦并六國始於韓者蓋李斯之策也秦初并天下令曰異日韓王納地效璽請爲藩臣已而倍約與趙魏合從畔秦故興兵誅之此則其出師之名也前漢地理志韓地角亢氐之分野也韓分晉得南陽郡及潁川之父城定陵襄城潁陽潁陰長社陽翟郟東接汝南西接弘農得新安宜陽皆韓分也及詩陳鄭之國與韓同星分野潁川南陽本夏禹之國夏人上忠其敝鄙朴

史記貨食傳潁川敦愿

韓自武子後

七世稱侯六世稱王五世而爲秦所滅秦旣滅徙天下不軌之民於南陽故其俗夸奢上氣力好商賈漁獵藏匿難制御也

華陽太后薨

解題曰按呂不韋傳華陽太后與孝文王會葬壽陵夏太后別葬杜東

大饑

解題曰秦紀趙世家書之蓋二國饑也

衛元君薨

解題曰衛世家書元君二十五年卒通鑑用徐廣說
書於二十三年今從之按廣注年二十三年卒今本
無之

秦始皇帝十八年定韓地

解題曰年表於虜韓王安之明年書秦滅韓於虜楚
王負芻之明年書秦滅楚於虜燕王喜之明年書秦
滅燕於虜齊王建之明年書秦滅齊於虜代王嘉之

明年書秦滅趙例以悉定其地為滅耳獨虜魏王假之明年不書秦滅魏豈非虜王假之年魏地卽定乎殺李牧廢司馬尚

解題曰按戰國策秦使王翦攻趙趙使李牧司馬尚禦之李牧數破走秦軍殺秦將桓齮王翦惡之乃冬與趙王寵臣郭開等金使爲反間曰李牧司馬尚欲與秦反趙以多取封於秦趙王疑之使趙葱及顏寗代將斬李牧廢司馬尚又載司空馬去趙謂平原令

曰趙將武安君期年而亡若殺武安君不過半年趙王之臣有韓倉者以曲合於趙王其交甚親其爲人嫉賢妬功臣今國危亡王必用其言武安君必死韓倉果惡之王使人代武安君至使韓倉數之曰將軍戰勝王觴將軍將軍爲壽於前而捍匕首當死武安君曰病鉤身大臂短不能及地起居不敬恐懼死罪於前故使工人爲木材以接手願公入明之韓倉曰受命於王賜將軍死不赦臣不敢言武安君北面再

拜賜死縮劍將自誅乃曰人臣不得自殺宮中趣出自殺其恭如此李牧傳乃謂李牧不受命趙使人微捕得斬之非也使不受命韓倉安得而數之豈非因廉頗不受代事而誤載乎

秦始皇帝十九年王翦虜趙王滅趙

解題曰趙嬴姓

與秦共祖惡來之後為秦惡來之弟季勝之後為趙

自烈侯受

封至王遷凡九世秦初并天下令曰趙王使其相李牧來約盟故歸其質子已而倍盟反我太原故興兵

誅之此則其出師之名也

淮南子曰趙王遷流於房陵思故鄉作為草木之謳

聞之者莫不流涕

前漢地理志曰趙地昴畢之分野趙分晉

得趙國北有信都真定常山中山又得涿郡之高陽
鄭州鄉東有廣平鉅鹿清河河間又得渤海郡之東
平舒中邑文安東州成平章武河以北也南至浮水
繁陽內黃斥丘西有太原定襄雲中五原上黨上黨
本韓之別郡也遠韓近趙後卒降趙皆趙分也趙中
山地薄人衆猶有沙丘紂浮亂餘民丈夫相聚游戲

悲歌忼慨起則椎剽掘冢作姦巧多弄物為倡優女
子弹弦跼躑游媚富貴偏諸侯之後宮邯鄲北通燕
涿南有鄭衛漳河之間一都會也其土廣俗雜大率
猜忿高氣勢輕為姦太原上黨又多晉公族子孫以
詐力相傾矜夸功名報仇過直嫁取送死奢靡鍾代
石北迫近胡寇民俗懞怯章岐反好氣為姦不事農商
自全晉時已患其剽悍而武靈王又益厲之定襄雲
中五原本戎狄地其民鄙朴少禮文好射獵

王翦屯中山

解題曰以臨燕也

王至邯鄲與母家有仇者皆坑之

解題曰始皇之拊新國如此

太后薨

解題曰始皇母也

楚幽王薨弟猶立是爲哀王

解題曰猶年表作郝

秦始皇帝二十年易水

解題曰史記正義云易水源出易縣西谷中之東東

南流與滹沱河合

水經易水出涿郡故安縣閭鄉西山

秦始皇帝二十一年薊遼東

解題曰薊燕國都也

今燕中府薊縣水經注云城內西北隅有薊丘因丘以名邑猶

魯之曲阜齊之營丘

遼東秦漢皆為遼東郡漢末為公孫度所

據魏司馬懿滅之復為郡西晉之亂慕容廆據之後

魏滅慕容氏其地尋入於高麗唐李勣平高麗置安

東上都護府統之至德後廢

王賁伐楚

解題曰按王翦傳秦使翦子王賁擊荆徐廣曰秦諱楚故云荆也

李信蒙恬將二十萬伐楚

解題曰按王翦傳李信蒙恬南伐楚王翦言不用因謝病歸老於潁陽本紀今年書王翦謝病老歸

大雨雪

解題曰按本紀大雨雪深二尺五寸

秦始皇帝二十二年王賁伐魏引河灌大梁滅魏

解題曰魏姬姓畢公高之後自文侯受封至王假九
九世秦初并天下下令曰魏王始約服已而與韓趙謀
襲秦秦兵吏誅遂破之此則其出師之名也前漢地
理志曰魏地觜觿參之分野也其界自高陵以東盡
河河東河內南有陳留及汝南之召陵潁疆新汲西
華長平潁川之舞陽鄆許鄆陵河南之開封中牟陽

武酸棗卷皆魏分也在晉之南河曲故其詩曰彼汾
一曲寘諸河之側至獻公滅魏以封大夫畢萬晉文
公霸諸侯尊周室始有河內之土吳札聞魏之歌曰
美哉汾風乎以德輔此則明主也文公後十六世魏
自立爲諸侯風俗見晉及秦分三十六郡解題溝洫志大司空掾王
橫言禹之行河水本隨西山下東北去周譜云定王
五年河徙則今所行非禹之所穿也又秦攻魏決河
灌其都決處遂大不可復補宜卻徙完平處更開空

使緣西山足而東北入海然則因秦引河灌大梁之

後禹之故道亦失矣

戰國策蘇代說燕王曰秦正告魏曰陸攻則擊河內水攻則滅

大梁魏以為然故事秦然則灌大梁之策戰國以來人皆知之矣

楚人大破李信軍復使王翦伐楚

解題曰王翦傳書李信攻鄢郢破之引兵而西與蒙恬會城父荆人大破李信軍按鄢郢白起取以置南郡是時不屬楚久矣傳之誤也

秦始皇帝二十三年王翦取陳以南至平輿大破楚軍

於斬殺其將軍項燕

解題曰按本紀今年王翦虜荆王荆將項燕立昌平
君爲荆王反秦軍於淮南明年王翦蒙武破荆軍昌
平君死項燕遂自殺年表世家王翦傳皆不載項燕
立昌平君事今兩存之

潁濱蘇氏曰昌平君者楚人
爲始皇相國攻嫪毐者也始

皇二十一年將攻
荆徙昌平君於郢

平輿今蔡州平輿縣

秦始皇帝二十四年王翦蒙武滅楚

解題曰楚芊姓出於祝融吳回之孫季連其後中微

或在中國或在蠻夷弗能紀其世季連之苗裔鬻熊
事文王封鬻熊曾孫於楚自熊繹至王負芻凡四十

一世秦初并天下令曰荆王獻青陽以西

漢書鄒陽傳曰越水

長沙還舟青陽蘇林曰青陽長沙縣是也

已而畔約擊我南郡故發兵誅

得其王此則其出師之名也前漢地理志曰楚地翼
軫之分野也今之南郡江夏零陵桂陽武陵長沙及
漢中汝南郡盡楚分也史記貨殖傳曰楚有三俗夫
自淮北沛陳汝南南郡此西楚也其俗剽輕易發怒

地薄寡於積聚江陵故郢都西通巫巴東有雲夢之

饒

徐廣曰在華容

陳在楚夏之交通魚鹽之貨其民多賈徐

僮取慮

徐廣曰皆在下邳

則清刻矜已諾彭城以東東海吳

廣陵此東楚也其俗類徐僮胸繒以北俗則齊浙江

南則越夫吳自闔廬春申招致天下之喜游子弟東

有海鹽之饒章山之銅三江五湖之利衡山九江江

南

徐廣曰高帝所置江南者丹陽也秦置為鄣郡武帝改名丹陽

豫章長沙是南楚

也其俗大類西楚郢之後徙壽春亦一都會也而合

肥受南北潮皮革鮑木輸會也與閩中於越雜俗故
南楚好辭巧說少信江南卑溼丈夫早夭總之楚越
之地地廣人希飯稻羹魚或火耕而水耨果隋蠃蛤
不待賈而足地勢饒食無饑饉之患以故訾窳偷生
無積聚而多貧是故江淮以南無凍餓之人亦無千
金之家

前漢地理志曰
信巫鬼重淫祀

楚世家書滅楚名為楚郡云

孫簡曰秦虜楚王負芻滅去楚名以楚地為秦郡秦
避莊襄王諱易楚為荆不應置楚郡簡之說是也但

三十六郡中亦無秦郡之名以地考之南郡九江郡
鄣郡會稽郡皆楚地也

秦始皇帝二十五年王賁滅燕

解題曰燕姬姓周武王封召公於北燕

史記正義曰地在燕山之

野故國取名焉燕山在幽州漁陽縣東南六十里燕姑姓之國黃帝之後在滑州

自召公受

封

索隱曰以元子就封而次子留周室代為召公

至王喜凡四十四世前漢

地理志曰燕地尾箕分野也東有漁陽右北平遼西
遼東西有上谷代郡鴈門南得涿郡之易容城范陽

北新城故安涿縣良鄉新昌及渤海之安次皆燕分也樂浪玄菟亦易屬焉初太子丹賓養勇士不愛後宮美女民化以爲俗男女無別反以爲榮其俗愚悍少慮輕薄無威亦有所長敢於急人燕丹遺風也史記貨殖傳曰燕亦勃碣之間一都會也南通齊楚東北邊胡上谷至遼東地踔遠人民希數被寇大要趙代俗相類有魚鹽棗栗之饒北鄰烏桓夫餘東綰濊貉朝鮮真番之利

王翦悉定楚江南地降越君置會稽郡

解題曰通鑑作降百越之君按賈誼過秦論南取百越之地以爲桂林象郡事在三十二年今年方置會稽郡百越固未盡服也

大事記解題卷六

欽定四庫全書

大事記解題卷七

宋 呂祖謙 撰

秦始皇帝二十六年王賁蒙恬滅齊

解題曰齊田姓陳公子完奔齊食采於田春秋後改
姓田氏自田和代齊至王建凡七世秦初并天下令
曰齊王用后勝計絕秦使欲為亂兵吏誅虜其王此
則其出師之名也

疆界風俗見周安王十一年齊田和徙其君康公解題

按蒙

恬傳始皇二十六年恬因家世得為秦將攻齊大破

之拜為內史秦之將帥多世其家賁翦之子也恬武
之子驚之孫也潁濱蘓氏曰韓魏趙楚與秦壤地相
接雖欲勉強抗秦而干戈日至勢不可矣如燕齊負
海前有四國之限燕弱不足言如齊之強使與四國
合從推其有餘以補不足時至而拯其亟雖秦之暴
亦安能遂滅諸侯乎然威宣方以其力攻伐諸侯不
親濬王取宋破燕求逞其欲不服及遠而王建媿安
自守僥倖秦之見容與五國相隨而亡吾觀六國之

亡其君無一人可以守國者楚考烈王死李園專國
負芻與王猶爭立僅能自定而秦兵至趙王遷信讒
以誅李牧魏景湣王用秦間以廢信陵韓王安制於
韓玆燕丹私怨始皇欲以刺客斃秦雖使秦寇不作
其勢亦不能久安矣而況秦乘其斃乎

更號皇帝

解題曰按本紀初并天下令丞相御史議帝號丞相
綰御史大夫劫廷尉斯等

秦變古官制今以前後漢百官表志通典考其大畧

附見於此相國不常置如穰侯呂不韋為之其權固
非他相比至於昌平君昌文君亦稱相國然則特重
其名耳丞相有左右金印紫綬始於甘茂樗里疾終
於馮去疾李斯大率常命兩相也侍中者本丞相史
也使五人往來殿內更相奏事故謂之侍中其後為
加官則其職浸重矣太尉金印紫綬掌武事呂不韋
月令曰孟夏太尉贊雋傑則秦有此官久矣御史大
夫位上卿銀印青綬掌副丞相有兩丞秩千石領侍
御史受公卿奏奏事舉劾按章一曰中丞在殿中掌
圖籍大夫者侍御史之率也御史之名見於周官以
中士下士為之特小臣之傳命令者耳至於戰國其
職益親故獻書多云獻書於大王御史澠池之會各
命御史書事而淳于髡亦曰御史在前執法在後是
又掌記事糾察之任也至秦人主自親事以操制臣
下侍御僕從其勢益重而御史大夫遂與丞相分權
矣前後左右將軍皆周末官秦因之位上卿金印紫

綬九卿並中二千石一曰奉常掌宗廟之儀博士屬焉廬生謂博士七十人皆弗用胡毋敬為秦太史令作博學七章博士太史令皆奉常之屬也二曰郎中令掌宮殿掖門戶詳見二世元年解題三曰衛尉掌宮門行屯兵四曰太僕掌輿馬趙高為中車府令太僕之屬也五曰廷尉掌刑辟廷尉班在五而議帝號獨出李斯名者蓋秦以獄為重李斯又方任事所以為九卿議者之首也六曰典客掌諸侯歸義蠻夷七曰宗正掌親屬八曰治粟內史掌穀貨九曰少府掌山海地澤之稅以給共養蓋治粟內史所掌穀貨共軍國之用少府名曰禁錢以給天子私養自別為藏少者小也少府屬官有尚書等十二官令丞少府吏四人在殿中主發書謂之尚書其後遂以為官故置令丞耳呂不韋出司空馬奔趙說趙王曰文信侯相秦臣事之為尚書習秦事然則始皇之初是職已號要劇矣又中書謁者黃門鉤盾尚方御府永巷內者

宦者七官令丞諸僕射署長中黃門皆屬焉佐弋謁者御府永巷宦者見於秦紀及范曄傳而通典設官沿革列黃門侍郎尚書令僕射尚書丞於秦官其餘必有漢所增者也僕射自侍中尚書博士郎軍屯吏騶宰永巷宦人皆有之古者重武官有主射以督課之隨所領之事以為號中黃門者謂奄人居禁中在黃門之內給事別於黃門令丞故曰中凡此所謂九卿也李斯自廷尉為丞相蒙恬自內史為大將然則九卿者將相出入之地也中尉掌徼循京師其秩雖亦中二千石後漢志九卿皆云卿一人至中尉獨不言卿則不預九卿之數矣將作少府掌治宮室詹事掌皇后太子家將行皇后卿也典屬國掌蠻夷降者內史掌治京師主爵中尉掌列侯自將作少府至主爵中尉秩皆二千石護軍中尉其秩闕蒙恬傳胡亥以李斯舍人為護軍即此職也侍中左右曹諸吏散騎中常侍皆加官所加或列侯將軍卿大夫將都尉

尚書大醫太官令至郎中員多至數十人侍中中
常侍得入禁中諸曹受尚書事諸吏得舉法散騎騎
並乘輿車給事中亦加官所加或大夫博士議郎掌
顧問應對位次中常侍中黃門有給事黃門位從將
大夫通典以加官為漢制然百官表加官一章其末
總結云皆秦制則出於秦無疑但漢因秦制廣之益
詳益重其間官名必多漢所增也秦之祿秩於史無
所考漢制三公號稱萬石其奉月各三百五十斛穀
其稱中二千石者月各百八十斛二千石者百二十
斛比二千石者百斛千石者九十斛比千石者八十
斛六百石者七十斛百石以下有斗食佐史之秩斗
食月奉十一斛佐史月奉八斛按范曄毀穰侯之辭
曰自斗食以上有非相國之人者乎王翦攻閼與歸
斗食以下秩居斗食以下者謂佐史也呂不韋死其
舍人六百石以上奪爵以此三事考之則漢之祿秩
大率皆秦制其間小有增損則不可知耳孟子論周

室制祿自上農夫食九人積之孔子使原思為宰與之粟九百而孟子為齊卿其祿十萬鍾然則自古至於秦漢無不以穀粟制祿也荀綽晉百官表注載後漢延平中中二千石月奉錢九千米七十二斛貞二千石月錢六千五百米三十六斛當殤帝之世百官奉祿猶米多錢少況於古乎 皆曰昔者

五帝地方千里其外侯服夷服諸侯或朝或否天子

不能制令陛下

按戰國策子楚與孝文王言稱陛下則秦稱之久矣蔡邕曰陛階也天子

必有近臣立於陛側以戒不虞謂之陛下者羣臣與天子言不敢指斥故呼在陛下者與之言因卑達尊之意也 平定天下法令繇一統自上古以來未嘗有五

帝所不及臣等謹與博士議曰

前漢百官表博士秦官掌通古今秩比六

百石員多
至數十人
古有天皇有地皇有泰皇泰皇最貴臣等

昧死上尊號王為泰皇命為制令為詔天子自稱曰

朕
蔡邕曰朕我也古者上下共稱之至
秦然後天子獨以為稱漢因而不改王曰去泰著

皇采上古帝位號號曰皇帝
兼三皇五帝以為號其
汰侈固不待言然丞相

以下議稱泰皇其不辭甚
矣君侈臣庸欲不亡得乎他如議制曰可
蔡邕曰羣
臣有所奏

請尚書令奏之下有司
曰制天子答之曰可

太上皇

解題曰三代稱王故武王既克商推王迹所起追王

太王王季文王始皇既自稱皇帝矣追尊其父乃獨去帝著皇豈非以父未嘗有天下不使同己之稱乎然則帝皇之義始皇初不知也

除謚法

解題曰五峯胡氏

宏

曰昔周公作謚法豈使子議父

臣議君哉合天下之公奉君父以天道耳孝愛不亦深乎所以訓後為君父者以立身之本也知本則身立家齊國治天下平不知本則縱慾恣暴惡聞其過

入於滅亡天下知之而不自知也唯其私而已是故
不合天下之公則為子議父臣議君夫臣子也君父
有不善所當陳善閉邪引之當道若生不能正既已
而黨之是不以天道事君父也謂之忠孝可乎

定為水德

解題曰方鄒衍推五德之運

史記正義曰始皇采鄒衍五德之運所勝五行

以周為火德自稱水德稱之用母代子如淳云

今視

之特陰陽末術耳

按檀弓夏后氏尚黑殷人尚白周人尚赤不過隨其所建所正以為

服色所尚耳未嘗
如衍之支離也

若無預於治亂之數也及至始皇
始採用之定為水德以為水德之治剛毅戾深事皆
決於法刻削毋仁恩和義然後合五德之數於是急
法久者不赦則其所繫豈小哉後世遂相沿以為大
事不可不紀也

以十月為歲首

解題曰子為天正於律為黃鍾鍾者種也陽氣種於
黃泉孽萌萬物為六氣元也丑為地正於律為大呂

呂者旅也陰大旅助黃鍾宣氣而牙物也寅為人正
於律為大簇簇者奏也陽氣大奏地而達物也自古
正朔不過此矣至於建亥之月萬物該藏豈有用之
為正者哉按秦紀昭王四十二年先書十月宣太后
薨次書九月穰侯出之陶四十八年先書十月韓獻
垣雍秦軍伐趙次書正月兵罷五十年先書十月白
起有罪為士伍次書十二月益發卒軍汾城旁次書
二月攻晉軍斬首六千而呂不韋春秋季秋紀亦書

合諸侯制百縣為來歲受朔日與諸侯所稅於民輕重之法則自昭王以來用十月為歲首久矣特始皇立定為制耳

從李斯議不置諸侯

解題曰五峯胡氏曰聖人理天下以萬物各得其所為極至封建也者帝王所以順天理承天心公天下之大端大本也郡縣也者霸世暴主之所以縱人欲悖天道私一身之大孽大賊也分天下有德有功者

以地而不敢以天下自私於是有百里七十里五十里不能五十里邦國之制焉於是有君朝卿大聘大夫小聘王巡狩侯述職之禮樂法度焉於是有千雉百雉三之一五之一之高城深池焉於是有井邑丘甸縣都之夫數焉於是有十乘百乘千乘萬乘之車數焉於是有五兩卒旅師軍之制焉於是有卿大夫司徒樂正取士之法焉邦國之制廢而郡縣之制作矣郡縣之制作而世襲之制亡矣世襲之制亡而數

易之弊生矣數易之弊生而民無定制矣巡狩述職之禮廢則上下之情不通攷文案而不究事實信文案而不任仁賢其弊有不可勝言者矣城池之制廢而禁禦暴客威服四夷之法亡矣夫家之法廢則民數不可詳矣民數不可詳而車乘不可出矣車乘不可出而軍師不隱於農矣軍師不隱於農坐食者衆而公私困窮矣世儒不知王政之本反以亡秦為可法所謂明君良臣者亦未免以天下自私無意於裁

成輔相使萬物各得其所所以歷千五百餘歲未有
能復之者也聖人制四海之命法天而不私盡制而
不曲防分天下之地以為萬國而舉英才共焉非後
世擅天下者以大制小以強制弱之謀也誠盡制而
已矣是以虞夏商周傳於長久皆千餘載論興廢則
均有焉語絕滅則至暴秦郡縣天下然後極也自秦
滅先王之制海內蕩然無有根本之固有今世王天
下而繼世無置錐之地者有今年貴為天子而明年

欲為匹夫不可得者天子尚然況其下者乎物有其
根則常而靜安而久常靜安久則理得其終物遂其
性封建者政之有根者也故上下辯民志定教化行
風俗美理之易治亂之難亡扶之易興亡之難滅郡
縣反是

分天下為三十六郡

解題曰三十六郡者內史

漢三輔及弘農郡

三川

漢河內河南兩郡

河東南陽南郡九江

漢並因之

鄆郡

治故鄆在今湖州長興縣西南官郡所治

當考漢改為丹楊郡

會稽潁川

漢竝
因之

碭郡

漢梁國

洒水

漢改沛郡

薛

郡

漢魯國

東郡瑯琊

漢竝因之

齊郡

漢齊國

上谷漁陽右北平

遼西遼東代郡鉅鹿邯鄲上黨大原雲中

漢竝
因之

九原

漢改為五原郡

鴈門上郡隴西北地漢中巴郡蜀郡

漢竝
因之

黔

中

漢改為武陵郡今鼎
澧辰沅黔州之地

長沙

漢長沙國

凡三十六郡其後

並南越閩越置桂林

漢改為
鬱林郡

南海

治番禺
漢因之

象郡

漢改
為日

南
閩
中

漢武帝虛其地

合四十郡

漢以秦郡大稍稍
分析詳見漢解題

三川河東在諸郡之首者蓋所以陪輔關中地勢莫

重焉即漢所謂三河也漢分三川為河南河內與河
東號為三河史記貨殖傳曰昔唐人都河東殷人都
河內周人都河南夫三河在天下之中若鼎足王者
所更居也建國各數百千歲土地小狹民人衆都國
諸侯所聚會故其俗纖儉習事

郡置守尉監

解題曰按前漢百官表郡守秦官掌治其郡秩二千

石郡尉秦官掌佐守典武職甲卒秩比二千石

漢郡國凡

百有三置都尉者九十後漢志云每屬國置都尉一人

監御史秦官掌監郡

戰國

策安邑之御史死其次恐不得也使安邑令為人請御史於王王曰彼固有次乎吾難敗法因遂置之然則六國時罔已遣御史監郡矣非獨秦也漢省之守者守其地也尉者分

其兵權也監者使其親昵監之也通典曰秦以御史監理諸郡謂之監察史

更民名曰黔首

解題曰應劭曰黔亦黎黑也

一衡石丈尺文字

解題曰自商君為政平斗桶權衡丈尺其制變於古
矣至是并天下一之皆令如秦制也秦之文字多李
斯趙高所定亦非保民之教也然此乃帝王初政之
常秦猶沿而行之至於後世則鮮或舉之矣

禮樂

解題曰接通典鄭玄禮序云周衰諸侯僭忒自孔子
時禮已不能具秦并天下收儀禮而歸之咸陽但采
其尊君抑臣以為時用

前漢志云諸侯踰越法度惡
禮制之害已去其篇籍遺秦

滅學遂以亂亡

通典又曰始皇平天下六代廟樂唯韶武存

焉二十六年改周大武曰五行房中曰壽人

前漢志曰周有

房中樂至秦名曰壽人五行舞者本周舞也秦始皇二十六年更名曰五行也儀禮燕禮記有房中之樂鄭氏注弦歌周南召南之詩而不用鐘磬之節也謂之房中者后夫人之所議誦以事其君子秦車

服之制可見者大駕屬車八十一乘周末諸侯有二

車九乘秦滅九國兼其車服故屬車八十一乘自以

尚水德故郊社服用皆以衿玄以從冕旒前後邃綈

蔡邕獨斷云衿紺繒也班固東都賦云衿皂也衿音鈞

又制通天冠其狀遺失

漢因秦名制之乘輿所常服又采楚制作遠遊冠滅
齊獲其君冠制高山冠賜近臣滅楚獲其君冠賜御

史謂之法冠

一名柱後惠文冠
或謂之獬豸冠

滅趙以其君冠賜近

臣謂之惠文冠所謂貂蟬也秦雄諸侯乃加其武將

首為絳袍表其貴賤其後稍稍作顏題謂之幘其畧

如此

秦車服制
並見通典

二世尤以鄭音為娛丞相李斯進諫

曰放棄詩書極音聲色祖伊所以懼也輕積細過恣
心長夜紂所以亡也趙高曰五帝三王樂各殊名示

不相襲朝廷下至人民得以接歡喜合殷勤非此和說不通解澤不流亦各一世之化度時之樂何必華

山之騷耳而後行遠乎二世然之

按李斯傳二世用趙高譖按李斯子

三川守繇與盜通狀李斯聞之是時二世在甘泉方作穀祗優俳之觀李斯不得見應劭曰戰國之時稍增講武之禮以為戲樂用相夸示而秦更名曰角抵文穎曰兩兩相當也見樂書李斯傳秦祀典

唯雍四時上帝為尊故雍四時春以為歲祠禱因泮

凍秋涸凍冬賽祠五月嘗駒及四中之月月祠

一歲九八

祭此常祭也

時四匹

顏師古曰每時用駒四匹

黃犢羔各四圭幣各有

數皆生瘞埋無俎豆之具

俎豆之廢自此始

三年一郊

此天子之

親郊也後世三年之郊始於此見郊祀志

收秦半之賦

解題曰按前漢食貨志始皇并天下內興功作外攘

夷狄收秦半之賦

師古曰秦半三分取其二

董仲舒曰秦改帝王

之制小民月為更卒已復為正一歲屯戍一歲力役

三十倍於古

師古曰更卒謂給郡縣一月而更者也正卒謂給中都官者也率計今人一歲

之中屯戍及力役之事三十倍多於古也

田租田賦鹽鐵之利二十倍於

古

如淳曰秦賣鹽鐵貴故下民受其困也師古曰既收田租又出口賦而官更奪鹽鐵之利率計今人

一歲之中失其資產二十倍多於古也漢四年八月初為算賦口賦與算賦之制當考或耕豪

民之田見稅什五

如淳曰什稅其五師古曰言下戶貧人自無田而耕墾豪富家田十

分之中以五輸本田主也

故貧民常衣牛馬之衣而食犬彘之食

重以貪暴之吏刑戮妄加民愁亡聊亡逃山林轉為盜賊赭衣半道斷獄歲以千萬數今並附見於始皇并天下之年

上弊下弊

解題曰按前漢食貨志秦兼天下弊為二等黃金以

鎰為名上弊

孟康曰二十兩為鎰史記正義曰二十四兩為鎰顏師古曰改周一斤之制更

以鎰為金之名數也高祖初賜張良金百鎰此尚秦制也上弊者二等之中黃金為上而錢為下也銅

錢質如周制文曰半兩

律歷志云一篇容千一百黍重十二銖兩之為兩二十四

銖為兩

重如其文而珠玉龜貝銀錫之屬為器飾寶藏

不為幣古者以玉為瑞以龜為寶以貝為貨而鐘鼎之屬則有國有家之所傳守也戰國以後以金錢為尚不曰黃金萬鎰則曰致訾千萬而已圭璧鐘鼎宗

廟朝廷之所重者徒以供耳目之玩若所謂龜貝者
又委於泥沙莫知其貴矣此風氣之一變也

築女懷清臺

解題曰按貨殖傳烏氏倮

韋昭曰烏氏縣名屬安定倮名也

畜牧及

衆斥賣求奇繒物間獻遺戎王戎王什倍其償與之
畜畜至用谷量馬牛秦始皇帝令倮比封君以時與
列臣朝請而巴蜀寡婦清其先得丹穴而擅其利數
世家亦不訾清寡婦也能守其業用財自衛不見侵

犯秦皇帝以為貞婦而客之為築女懷清臺始皇之所褒表賓禮者如此史失其年今載於初并天下之歲

秦始皇帝二十七年隴西北地雞頭山回中

解題曰此始皇既并天下巡郡縣之始也隴西唐隴右道今秦河鞏熙涼沙等州之地北地今寧州雞頭山在城州上祿縣東北鄜道元云蓋大隴山異名也

回中宮在雍州西

自北地以下並見史記正義

作極廟

解題曰始皇預自為廟也漢之作顧成廟放此

見羣臣尊

始皇廟議

賜民爵一級治馳道

解題曰以治馳道之勞故賜之爵也自此後終秦世
賜爵者不重出賈山至言曰秦為馳道於天下東窮
燕齊南極吳楚江湖之上濱海之觀畢至道廣五十
步三大而樹厚築其外隱以金椎樹以青松為馳道

之麗至於此使其後世曾不得邪徑而託足焉

秦始皇帝二十八年鄒嶧山刻石

解題曰刻石始於此史記正義曰國系云邾嶧山魯穆公改邾作鄒其山遂從邑變山在兗州鄒縣南北去黃河三百餘里

封泰山禪梁父

解題曰文中子曰封禪之費非古也徒以誇天下其秦漢之侈心乎史記正義曰泰山在兗州博城縣西

北梁父在兗州泗水縣北

作琅邪臺

解題曰按本紀竝勃海以東過黃腫

史記正義曰腫遂瑞反黃縣故

城在萊州黃縣東南古腫縣在黃縣南

窮成山

史記正義曰在萊州文登縣西北

登之

罾

史記正義曰在萊州文登縣東北

立石頌秦德焉而去南登琅邪

大樂之留三月乃徙黔首三萬戶琅邪臺下

史記正義曰琅

邪山在密州諸城縣東南始皇立層臺於山上

復十二歲作琅邪臺

復者復除其賦

役也然復有大小遠近之別有復其縣成者有復其租稅者有復其身者有復其家者有復一歲者有復

二歲者有復三歲者有復十二歲者有復終身者有復其後世者載在漢書皆可考也

立石刻

頌秦德曰維秦王兼有天下立名為皇帝乃撫東土
至於琅邪列侯武城侯王離列侯通武侯王賁倫侯
建成侯趙亥倫侯昌武侯成倫侯武信侯馮毋擇丞相
隗林丞相王綰卿李斯卿王戊五大夫趙嬰五大夫
楊膠從與議於海上

列侯之下復有倫侯當考

武關

解題曰今商州商洛縣有少習即秦武關也文潁曰

武關在浙西百七十里弘農界

秦始皇帝二十九年東游至陽武博浪沙中

解題曰博浪沙在鄭州陽武縣界當官道

見史記正義張

良大父開地相韓昭侯宣惠王襄哀王父平相釐王
悼惠王悼惠王二十三年平卒卒二十歲秦滅韓良
年少未官事韓韓破良家僮三百人弟死不葬悉以
家財求客刺秦王為韓報仇以大父父五世相韓故
致堂胡氏曰或者謂良年少輕用其身黃石老父蓋

不喜也故為復期之約墮履之事屈折其虛氣使能
隱忍以就大者是不知良也良本為報讐非有事漢
之志苟得弊呂政於一椎則心愜矣餘亦何求哉或
者不達又若虞其敗者夫以秦皇狙詐之智虎狼之
威千乘萬騎之衆揮椎奮擊既無覺者大索天下又
不能得良非獨免併免力士其智畧之妙固已視呂
政如置中兔何敗獲之憂乎是亦淺之乎待良矣

秦始皇帝三十一年更名臘曰嘉平

解題曰索隱曰應劭曰夏曰清祀殷曰嘉平周曰大臘蓋改從殷號秦重伏臘故有羊米之賜

使黔首自實田

解題曰阡陌之弊至是出矣使井田不廢何患田之不實乎杜氏通典曰自秦孝公隳經界立阡陌雖獲一時之利而兼并踰僭興矣阡陌既弊又為隱覈隱覈之法憑乎簿書簿書既廣必藉衆功藉衆功則政繇羣吏則人無所信矣夫行不信之法委政於衆多

之胥欲紀人事之衆寡明地利之多少雖申商督刑
撓首總筭不可得而詳矣不變斯道而求治者未之
有也

微行逢盜

解題曰始皇為微行咸陽

張晏曰若微行之
所為故曰微行

與武士

四人俱夜出逢盜蘭池見窘武士擊殺盜關中大索

二十日

秦始皇帝三十二年東巡刻碣石門

解題曰按本紀刻碣石門

徐廣曰一作盟

壞城郭決通

隄防其辭曰皇帝奮威德并諸侯初一秦平墮壞城郭決通川防夷去險阻地勢既定黎庶無繇天下咸撫五峯胡氏曰制井田所以制國也所以制王畿也王畿安強萬國親附所以保衛中夏禁禦四夷也先王建萬國親諸侯高城深池徧天下四夷雖虎猛狼貪安得肆其欲而逞其志乎此三王為萬世慮禦四夷之上策也王公設險以守其國孔子所以書於習

坎之彖也城郭溝池以為固孔子所以答言偃之問也自秦而降郡縣天下中原世有戎狄之禍矣悲夫考入海方士

解題曰瓚曰考較其虛實

秦始皇帝三十三年發諸嘗逋亡人贅壻賈人擊南越
解題曰漢武帝發天下七科謫一曰吏有罪始皇適
治獄吏不直者築長城即此科也二曰亡命三曰贅
壻四曰賈人即今歲所發嘗逋亡人贅壻賈人也五

曰故有市籍六曰父母有市籍七曰大父母有市籍
皆賈人之類也然則所謂七科謫者其因秦之舊乎
兵出於農固有定籍矣更有罪者席其故官亡命者
去其鄉土贅壻者託於婦家賈人以下皆身不在農
畝是七科皆非調發所及故謫之此雖暴政然亦有
說也南越君長史不書閩越王無諸及越東海王搖
者其先皆越王勾踐之後也姓鄒氏秦已并天下皆
廢為君長以其地為閩中郡置閩中郡史失其年令

附於置桂林南海象郡之後

蒙恬大破匈奴收河南地築長城

解題曰按本紀列傳蒙恬西北斥逐匈奴匈奴單于

頭曼不勝秦北徙悉收河南地

北河之南

自榆中

徐廣曰在金城

金城郡在漢涼州刺史所部也

竝河以東屬之陰山

列傳云渡河據陽山徐廣曰五

原西安陽縣北有陰山在河南陽山在河北然則秦地跨河北陽山長城止屬於陰山耳趙武靈王築長

城自代竝陰山下至高關為塞五原郡屬漢并州刺史所部即秦之九原郡也陰山陰山縣漢武帝攘斥

匈奴置陰山縣屬五原郡唐屬安北大都護府

因河為塞築長城

水經注楊泉物理論

曰秦始皇使蒙恬北築長城死者相屬民歌曰生男慎勿舉生女哺用餽不見長城下尸骸相支柱其冤痛如

因邊山險壅谿谷可繕者治之起臨洮

漢隴西郡有臨

洮至遼東萬餘里又使蒙恬渡河取高闕

水經注趙武靈王自

代竝陰山下至高闕為塞山下有長城長城之際連山刺天其山中斷兩岸望若闕焉自關北出荒中關口有城跨山結局謂之高闕戍自古迄今常置重捍以防塞道史記正義曰地理志云朔方臨戎縣北有連山中斷而峯俱峻名

陶山北假中

晉灼曰王莽傳云五原北假膏

為高闕朔方今夏州

壤殖穀北築亭障以逐戎人恬居上郡

今麟延安丹坊鄜銀夏綏

德保安之地

十餘年威振匈奴

主父偃書曰昔秦皇帝欲攻匈奴李斯諫曰靡殺中

國快心匈奴非長策也秦皇帝不聽遂使蒙恬將兵
攻胡辟地千里李斯方助始皇為虐必無此諫特趙
高繼斯其虐尤甚故人
以斯為忠得此虛美也

運芻粟北河

解題曰按主父偃書秦皇帝使蒙恬將兵而攻胡卻
地千里以河為境又使天下飛芻輓粟起於黃腫琅

邪負海之郡轉輸北河率三十鍾而致一石

師古曰
六斛四

斗為鍾計其道路所費九用
百九十二斛乃得一石至

男子疾耕不足於糧餉

女子紡績不足於幃幕百姓靡敝孤寡老弱不能相

養道死者相望又按水經及注河自西域注于蒲昌

海

一名鹽澤至玉門陽關一千三百里廣輪四百里其水澄渟冬夏不減

隱淪不見復

出於積石山

山在西羌之中燒當所居也後漢延熹二年校尉段熲討燒當至積石山

屈

而東北流逕於析支

界為河曲羌人所居謂之河曲羌也

東北逕歷敦

煌酒泉張掖南又東過隴西金城天水又東北過安

定又北過北地朔方又屈而北流為北河東逕於高

闕南

自高闕東南逕朔方九原東過雲中又南過定襄上郡又南逕蒲江又南過北屈又南出龍門

口

以謫徙民戍五嶺河南

解題曰按本紀為桂林象郡南海以適遣戍

徐廣曰五十萬

人守五嶺

索隱曰初縣即上自榆中屬陰山為三十四縣

是也匈奴傳作四十四縣

史記正義云裴駰云廣州記云五嶺者大庾始安臨

賀揭陽桂陽輿地志云一曰臺嶺亦名塞上今名大庾二曰騎田三曰都龍四曰萌諸五曰越嶺

彗星出西方

解題曰本紀作明星出西方徐廣曰皇甫謐云彗星

見

秦始皇帝三十四年焚書

解題曰按本紀列傳始皇置酒咸陽宮博士七十人

前為壽博士僕射周青臣

前漢百官表僕射秦官自侍中尚書博士郎軍屯吏

騶宰永巷皆有古者重武官有主射以督課之取其領事之彌孟康曰皆有僕射隨所領之事以為號也軍屯吏則曰軍屯僕射永巷則曰永巷僕射後漢百官志博士僕射中興轉為祭酒頌稱始皇

威德始皇悅博士齊人淳于越進曰臣聞殷周之王

千餘歲封子弟功臣自為枝輔今陛下有海內而子

弟為匹夫卒有田常六卿之臣無輔拂何以相救哉

事不師古而能長久者非所聞也。今青臣又面諛以重陛下之過，非忠臣。始皇下其議，丞相李斯曰：「陛下創大業，以建萬世之功，固非愚臣所知。且越言三代之事，何足法也？」今諸生人善其所私學，以非上之所建立，禁之便。臣請史官非秦記皆燒之。」

六國表云秦既得意燒天

下詩書諸侯史記尤甚為其有所刺譏也。詩書所以復見者多藏人家，而史記獨藏周室，以故滅惜哉。獨有秦記又不載。日月具文畧不具。非博士官所職，天下敢有藏詩書

百家語者，悉詣守尉雜燒之。

所燒者天下之書。博士官所職固自若也。蕭何

獨收圖籍而遺此惜哉

有敢偶語詩書棄市以古非今者族吏

見知不舉者與同罪

此見知之法也

令下三十日不燒黥為

城旦

如淳曰晝日伺寇虜夜募築長城城旦四歲也

所不去者醫藥卜筮種

樹之書

前漢藝文志秦焚書而易為筮卜之事傳者不絕古者教人之通法詩書禮樂而已至於

易則未嘗躡等與人是孔子孟子之問答初未嘗及易也若如魏晉祖尚浮虛譚老易者徧天下則秦焚之欲以學法令以吏為師

此商鞅之法事見周報王十年解題制曰

可餘見通鑑始皇下淳于越之議意雖惡之然未必

如李斯之酷也逢君之惡其罪大斯之謂與戰國陋

儒誦章句而不知踐履守陳跡而不識時宜荀卿疾之於是輕詩書法後王以矯一時之弊初不知李斯假其說其禍如此其極也天下之患始於陋儒而疾陋儒者實成之

秦始皇帝三十五年甘泉

解題曰史記正義云括地志云甘泉在雍州雲陽西北秦始皇作甘泉宮去長安三百里望見長安

作宮阿房及穿治麗山

解題曰按本紀阿房宮未成欲擇令名名之作宮
阿房故天下謂之阿房宮始皇初即位穿治麗山及
并天下其役益侈矣至是遂役七十萬人分作阿房
麗山焉

史記正義云括地志云秦阿房宮
亦曰阿城在雍州長安縣西北

徙三萬家驪邑五萬家雲陽

解題曰驪邑始皇之陵邑也漢自人君即治山陵及
徙民置邑陵旁皆秦制也雲陽甘泉宮所在也秦開
直道表謂之通甘泉紀謂之邸雲陽漢武帝幸甘泉

祠秦乙而公卿稱皇帝郊見泰乙雲陽蓋乙地也在

漢屬左馮翊

史記正義云括地志云驪邑在雍州新豐縣本周時驪戎邑

坑諸生

解題曰按本紀侯生盧生相與謀曰始皇為人天性剛戾自用起諸侯并天下意得欲從以為自古莫及已專任獄吏獄吏得親幸博士雖七十人特備員弗用丞相諸大臣皆受成事倚辦於上上樂以刑殺為威天下畏罪持祿莫敢盡忠上不聞過而日驕下懾

伏謾欺以取容秦法不得兼方不驗輒死然候星氣者至三百人皆良士畏忌諱諛不敢端言其過天下之事無小大皆決於上上至以衡石量書

石百二十斤日

夜有呈不中呈不得休息貪於權勢至如此未可為求仙藥於是乃亡去始皇聞亡乃大怒使御史悉按問諸生犯禁者皆坑之餘見通鑑延平陳氏曰燒詩書殺學士秦之所以亡也其所以致亡者始於自用自用則惡夫非之者而儒生分別是非常不可屈已

以從天下之善而欲屈天下從已私能無亡乎

秦始皇帝三十六年徙民三萬家於北河榆中

解題曰以備匈奴也按水經注榆中在金城東五十

許里

唐勝州榆林縣

即漢書所謂榆溪舊塞者也自溪西去

悉榆柳之數矣

秦始皇帝三十七年始皇出遊左丞相斯少子胡亥從

解題曰東坡蘇氏曰李斯佐始皇定天下不可謂不

智扶蘇親始皇子秦人戴之久矣陳勝假其名猶足

以亂天下而蒙恬持重兵在外使扶蘇不即受誅而復請之則斯高無遺類矣以斯之智而不慮此何哉曰嗚呼秦之失道有自来矣豈獨始皇之罪自商鞅變法以殊死為輕典以慘夷為常法人臣狼顧脅息以得死為幸何暇復請方其法之行也求無不獲禁無不止鞅自以為軼堯舜而駕湯武矣及其出亡而無所舍然後知為法之弊夫豈獨鞅悔之秦亦悔之矣荆軻之變持兵者熟視始皇環柱而走莫之救者

以秦法重故也李斯之立胡亥不復忌扶蘇者知威
令之素行而臣子不敢復請也扶蘇之不敢請亦知
始皇之驚悍而不可回也豈料其偽也哉周公曰平
易近民民必歸之孔子曰有一言而可以終身行之
其恕矣乎夫以忠恕為心而以平易為政則上易知
而下易達雖有賣國之姦無所投其隙倉卒之變無
自發焉然其令行禁止盖有不及商鞅者矣而聖人
終不以彼易此商鞅立信於徙木立威於棄灰刑其

親戚師傅積威信之極以及始皇秦人視其君如雷
電鬼神不可測也古者公族有罪三宥然後制刑今
至使人矯殺其太子而不忌太子亦不敢請則威信
之過也故夫以法毒天下者未有不反中其身及其
子孫者也漢武與始皇皆果於殺者也故其子如扶
蘇之仁則寧死而不請如戾太子之悍則寧反而不
訴知訴之必不察也戾太子豈欲反者哉計出於無
聊也故為二君之子者有死與反而已李斯之智蓋

足以知扶蘇之必不反也吾又表而出之以戒後世人主之果於殺者

葬始皇於驪山

解題曰前漢劉向上成帝疏曰黃帝葬於橋山堯葬濟陰丘壠皆小葬具甚微舜葬蒼梧二妃不從禹葬會稽不改其列殷湯無葬處文武周公葬於畢秦穆公葬於雍橐泉宮祈年館下櫟里子葬於武庫皆無丘壠之處夫死者無終窮而國家有廢興此聖帝明

王賢君智士遠覽獨慮無窮之計也其賢臣孝子亦承命順意而薄葬之此誠奉安君父忠孝之至也秦惠文武昭莊襄五王皆大作丘壠多其瘞藏咸盡發掘暴露始皇帝葬於驪山之阿下錮三泉上崇山墳其高五十餘丈周回五里有餘石槨為游館人膏為燈燭水銀為江海黃金為鳬鴈珍寶之藏機械之變棺槨之麗宮館之盛不可勝原又多殺宮人生殮工匠計以萬數天下苦其役而反之驪山之作未成而

周章百萬之師至其下矣項籍燔其宮室營宇往者咸見發掘其後牧兒亡羊羊入其鑿牧者持火照牛羊失火燒其藏櫛自古至今葬未有盛如始皇者也數年之間外被項籍之災內罹牧豎之禍豈不哀哉是故德彌厚者葬彌薄知愈深者葬愈微無德寡知其葬愈厚丘壠彌高宮廟甚麗發掘必速繇是觀之明暗之効葬之吉凶昭然可見矣

殺蒙恬蒙毅


解題曰太史公曰吾適北邊自直道歸行觀蒙恬所
為秦築長城亭鄣漸山堙谷通直道固輕百姓力矣
夫秦之初滅諸侯天下之心未定瘡傷者未瘳而恬
為名將不以此時強諫振百姓之急養老存孤務脩
衆庶之和而阿意興功此其兄弟遇誅不亦宜乎何
乃罪地脉哉

潁濱蘇氏曰毅以忠信事上自許無罪
死而不厭夫偷合取容咎亞李斯此其

所以不
免者哉

復行錢

解題曰秦行半兩錢意者始皇末年嘗不用錢而二世復之也



大事記解題卷七